

**NO. SOALAN : 43**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN LIM KIT SIANG [ GELANG PATAH ]**

**TARIKH : 16 MAC 2015**

**RUJUKAN : 7699**

**SOALAN:**

**Tuan Lim Kit Siang [ Gelang Patah ]** minta **MENTERI DALAM NEGERI** menyatakan mengapa Kerajaan Persekutuan tidak mempedulikan kesimpulan Laporan Suruhanjaya Siasatan DiRaja ke atas Pendatang Tanpa Izin di Sabah yang mengakui wujudnya "Projek IC" dan mengambil tindakan tegas dan segera mengenal pasti orang yang bertanggungjawab melakukan jenayah penyusupan orang asing di negeri Sabah sekian lama.

## **JAWAPAN :**

Tuan yang di-Pertua,

**Seperti mana yang dimaklumi, Seri Paduka Baginda Yang di-Pertuan Agong telah memperkenankan penubuhan Suruhanjaya Siasatan Pendatang Asing di Sabah menurut Seksyen 2(1)(d) dan Seksyen 3(1) Akta Suruhanjaya Siasatan 1950 pada 6 September 2012 dan menetapkan lapan (8) Terma Rujukan bagi Suruhanjaya ini. Seterusnya ketelusan Kerajaan juga dapat dilihat melalui keputusan Jemaah Menteri yang telah bersetuju supaya hasil siasatan dan laporan Suruhanjaya ini diumumkan kepada orang ramai dan ia juga telah dilaksanakan pada 03 Disember 2014 melalui Sidang Media oleh YBhg. Tan Sri Ketua Setiausaha Negara.**

**Bagi memastikan tindakan susulan diambil hasil terhadap syor dan laporan Suruhanjaya ini, maka Kerajaan telah bersetuju untuk menubuhkan Jawatankuasa Pengurusan Warga Asing di Sabah. Dalam memuktamadkan fungsi dan peranan Jawatankuasa ini beberapa siri perbincangan dan tindakan penyelarasan telah diadakan dengan Kerajaan Negeri Sabah termasuklah agensi Kerajaan yang terlibat dalam urusan penguatkuasaan seperti Jabatan Pendaftaran Negara dan Jabatan Imigresen Malaysia. Jawatankuasa ini mempunyai struktur dua (2) tier iaitu:-**

- a) **Jawatankuasa Induk Pengurusan Warga Asing di Sabah yang dipengerusikan bersama oleh YAB Ketua Menteri Sabah dan YB Menteri Dalam Negeri yang antara lainnya diberi tanggungjawab untuk menggubal dasar dan strategi pendekatan pengurusan warga asing di Sabah serta memantau pelaksanaan dasar dan program oleh agensi yang berkaitan berhubungan pengurusan warga asing ini. Jawatankuasa ini juga telah mengadakan mesyuaratnya yang terkini pada 10 Februari 2015; dan**
- b) **Jawatankuasa Teknikal Pengurusan Warga Asing di Sabah yang dipengerusikan oleh YB Tan Sri Datuk Seri Panglima Joseph Pairin Kitingan, Timbalan Ketua Menteri Sabah. Jawatankuasa ini antara lainnya diberi tanggungjawab untuk meneliti laporan dan dapatan Suruhanjaya Siasatan dan mengemukakan cadangan penambahbaikan terhadap pengurusan warga asing di Sabah, mengkaji pelaksanaan sedia ada pengurusan warga asing di Sabah, mendapatkan maklum balas daripada masyarakat Sabah berhubung penambahbaikan pengurusan warga asing di Sabah, mengemukakan syor ke atas status keberadaan warga asing di Sabah mengikut undang-undang dan peraturan dan seterusnya mencadangkan pelan tindakan bagi pengurusan warga asing di Sabah. Jawatankuasa ini juga telah mengadakan mesyuaratnya yang terkini pada 17 Februari 2015.**

**Tuan Yang di-Pertua,**

**Turut dimaklumi bahawa Suruhanjaya Siasatan juga menyentuh mengenai “Projek IC” yang telah dibangkitkan oleh saksi-saksi dari kalangan ahli politik, penulis, wartawan dan orang ramai. Dalam hal ini, Suruhanjaya telah membuat kesimpulan bahawa terdapat kebarangkalian “Projek IC” ini wujud namun ia hanyalah berdasarkan keterangan lima (5) orang saksi sahaja. Walau bagaimanapun, saksi-saksi ini bukan sahaja tidak tertakluk kepada pemeriksaan balas malah merupakan bekas pegawai dan kakitangan Jabatan Pendaftaran Negara Sabah yang pernah ditahan di bawah Akta Keselamatan Dalam Negeri 1960 berkaitan penglibatan mereka dalam pengeluaran kad-kad pengenalan secara haram. Kementerian ini juga ingin memperjelaskan bahawa tindakan ke atas 23 orang pegawai dan kakitangan JPN yang terlibat dengan sindiket pengeluaran Kad Pengenalan tidak teratur telah pun diambil lama sebelum penubuhan Suruhanjaya Siasatan dan mereka juga diambil tindakan tatatertib dengan dibuang kerja.**

**Seperkara yang perlu diberikan perhatian bahawa, adalah wajar untuk kita turut sama mengambil maklum bahawa Suruhanjaya Siasatan juga mendapati Jabatan Pendaftaran Negara telah melaksanakan pelbagai inisiatif sebelum ini untuk meningkatkan dan menambahbaik sistemnya secara beransur-ansur dalam menangani penyalahgunaan yang dilakukan oleh sindiket/individu tertentu. Hal ini termasuklah pengeluaran Kad Pengenalan secara berpusat (*centralisation*) dengan menggunakan Sistem Pengecaman Capjari Bersepadu (*Automated***

***Fingerprint Identification System–AFIS***), langkah-langkah menambahbaikkan tatacara pengendalian standard pengeluaran Kad Pengenalan dengan memperkenalkan ciri-ciri keselamatan yang baik serta berkesan, penubuhan Unit Khas Sabah dan Sarawak untuk menangani permohonan Kad Pengenalan bermasalah, serta memanfaatkan *Agency Link-Up Information System (ALIS)* dalam penentusahan maklumat yang meragukan.

Tuan Yang di-Pertua,

Kerajaan juga amat berharap agar isu mengenai pendatang asing di Sabah ini tidak lagi dipolemikkan. Kerajaan ingin menumpukan segala perhatian ke hadapan (*way forward*) dalam menyelesaikan isu yang dibangkitkan ini melalui Jawatankuasa Pengurusan Warga Asing di Sabah dan menjadikan dapatan Suruhanjaya Siasatan sebagai panduan dan rujukan. Oleh itu dakwaan yang menyebut bahawa Kerajaan Persekutuan tidak mempedulikan laporan Suruhanjaya Siasatan adalah merupakan dakwaan yang tidak berasas sama sekali.